



**PRINCIPIOS REITORES DE
PREVENCIÓN DA
RESPONSABILIDADE PENAL DE
CLECE**

1. Obxecto

No marco do Código Ético de Clece, S.A., e as súas filiais (no sucesivo, CLECE), e como parte do modelo de prevención de delitos que CLECE ten implantado, recóllese a continuación unha serie de principios que deberán rexer a actuación profesional das persoas integrantes de CLECE a fin de previr ou evitar que poidan levar a cabo condutas que deriven en responsabilidade penal para elas e para CLECE.

En consecuencia, por medio destes principios reitores quedará prohibida a execución das condutas que a seguir se detallan, mesmo cando estas se executen en nome ou por conta de CLECE e mesmo cando se persiga un proveito ou beneficio, directo ou indirecto, de calquera clase para CLECE.

2. Alcance

Estes principios reitores son aplicables a todos os empregados de todas as áreas de CLECE, incluídas unións temporais de empresas (UTE), con independencia da modalidade contractual que determine a súa relación laboral, da posición que ocupen ou do lugar no que desempeñen o seu traballo.

3. Principios reitores e condutas prohibidas

3.1. Prevención da corrupción para ser unha empresa máis competitiva e sustentable, ademais de contribuír a crear unha sociedade máis xusta

Neste sentido, quedan prohibidas as condutas que teñan por obxecto:

- Ofrecer ou entregar a comerciais, administradores, directivos ou empregados doutra entidade ou empresa calquera vantaxe ou beneficio non-xustificado, como contraprestación nunha transacción económica, para favorecer indebidamente a CLECE.
- Solicitar ou aceptar doutra empresa ou entidade calquera vantaxe ou beneficio non-xustificado, como contraprestación nunha transacción económica, para favorecer indebidamente esa entidade ou empresa fronte a outras.
- Ofrecer ou entregar dádiva ou retribución de calquera clase a unha autoridade e/ou funcionario público para que este, en relación co exercicio das súas funcións públicas, actúe ou deixe de actuar para manter algún contrato, ou obter unha vantaxe ou beneficio de calquera clase para CLECE.
- Atender á petición dunha autoridade e/ou funcionario público de que se lle entregue dádiva ou retribución de calquera clase para que este actúe ou deixe de actuar en relación co exercicio das súas funcións públicas co fin de conseguir un beneficio ou vantaxe de calquera clase para CLECE.

- Influir nun funcionario público ou nunha autoridade valéndose da relación persoal que se teña con ela a fin de obter unha resolución beneficiosa para un mesmo ou para CLECE.
- Aceptar ou solicitar dádivas ou calquera outra remuneración promesa para influir en funcionario público a fin de conseguir unha resolución que poida xerar directa ou indirectamente un beneficio económico para un mesmo ou para a empresa.
- En actividades económicas internacionais, ofrecer ou entregar calquera beneficio ou vantaxe indebida para corromper unha autoridade ou funcionario público estranxeiro a fin de beneficiar a CLECE na súa actividade.
- Solicitar dádivas ou promesas para non participar nun concurso ou poxa pública, ou tentar afastar de concursos ou poxas outros ofertantes mediante ameazas, dádivas ou promesas.

3.2. Negativa a participar en ou a encubrir estafas, branqueo de capitais, insolvencias punibles ou falsidades para asegurar unhas regras do xogo limpas

Baixo este principio, quedan prohibidas as seguintes condutas:

- Inducir a erro a terceiros mediante engano para que realicen un acto de disposición patrimonial (entregar diñeiro, facer un pago etc.), no seu prexuízo propio ou de terceiros, a fin de conseguir un beneficio ou lucro para CLECE.
- Realizar calquera acto de disposición patrimonial ou xerador de obrigas para a empresa tendente a diminuír ou ocultar os bens da empresa coa intención de eludir o pago de responsabilidades civís, ou co fin de dificultar ou impedir a eficacia dun embargo en prexuízo dos acredores da empresa.
- Ocultar ou destruír bens da empresa que estean incluídos nun proceso concursal, facer transferencias de diñeiro ou outros activos patrimoniais, ou asumir débedas que non garden proporción coa situación patrimonial do debedor, ou vender ou prestar servizos por prezo inferior ao seu custo de adquisición ou produción, nunha situación de insolvencia patrimonial actual ou inminente.
- Cometer irregularidades na xestión da contabilidade da empresa, non levar ou levar dobre contabilidade, ou ocultar ou destruír a documentación que a empresa ten obriga de gardar, nunha situación de insolvencia patrimonial actual ou inminente.
- Participar en operacións ou transaccións destinadas a adquirir ou transmitir bens sabendo que estes teñen a súa orixe nunha actividade delituosa, para encubrir a súa orixe ilícita.
- Falsificar ou usar, coñecendo a súa falsidade, cartóns de crédito ou débito, ou cheques de viaxes, ou distribuír moeda falsa.
- Falsificar ou simular datos en facturas, recibos, contratos ou calquera outro documento de CLECE que afecte a terceiros.
- Facer doazóns ou achegas a partidos políticos.

3.3. Prevención dos delitos contra a Facenda Pública e a Seguridade Social para axudar ao sostemento das arcas públicas e dos servizos esenciais

Para cumprir con este principio, quedan prohibidas as condutas que teñan por obxecto:

- Eludir o pago de tributos, cantidades retidas ou que se deberon reter, ou ingresos a conta, á Facenda Pública.
- Obter devolucións ou gozar de beneficios fiscais da Facenda Pública, indebidamente en ambos os casos.
- Non pagar as cotas correspondentes á Seguridade Social, obter indebidamente a súa devolución ou gozar de deducións de forma indebida.
- Obter prestacións da Seguridade Social para un mesmo ou para a empresa, ou a súa prolongación, mediante simulación ou ocultación de feitos sobre os que se debía informar.
- Falsear as condicións requiridas para obter subvencións ou axudas das administracións públicas ou ocultando as que impedisen a concesión.
- Incumprir a obriga de xestión de contabilidade, libros ou rexistros. fiscais, ou levar contabilidades distintas para unha mesma actividade ou exercicio económico.
- Non anotar nos libros obrigatorios negocios, operacións ou transaccións económicas, ou anotalos con cifras falsas ou, en xeral, facer anotacións contables ficticias.
- Obstaculizar a actividade inspectora.

3.4. Uso adecuado das novas tecnoloxías con respecto á propiedade intelectual e industrial, aos consumidores e á intimidade dos individuos, que acentúa o noso compromiso coa innovación e o desenvolvemento

Para usar de forma adecuada e respectuosa as novas tecnoloxías, quedan prohibidas as condutas seguintes:

- Vulnerar a intimidade doutra persoa ou descubrir información que é secreta accedendo a cartas, mensaxes de correo electrónico ou calquera outros documentos ou efectos persoais sen o consentimento da persoa.

- Difundir ou revelar información persoal obtida sen o consentimento do afectado ou utilizar e modificar os datos persoais contidos en soportes informáticos sen autorización do afectado e vulnerando a súa intimidade.
- Infrinxir por calquera medio os dereitos de propiedade intelectual e industrial sobre obras ou produtos mediante a súa reprodución, copia ou plaxio, ou mediante a súa fabricación, importación, tenza, uso ou introdución en territorio español sen consentimento do seu titular e con coñecemento do seu rexistro.
- Copiar software (programas, sistemas operativos etc.), descargar arquivos de Internet sen a correspondente autorización ou licenza, ou publicar na web enlaces a páxinas de descargas ilegais.
- Pór en risco a seguridade e estabilidade dos equipos, dos sistemas ou da información contida neles.
- Inutilizar ou burlar calquera medida de seguridade despregada para salvagardar os medios tecnolóxicos e da información de CLECE ou de terceiros.
- Alterar, borrar ou bloquear programas ou sistemas informáticos alleos utilizando os sistemas de CLECE ou dun terceiro.
- Revelar un segredo de empresa cando se ten legal ou contractualmente obriga de gardar reserva, coñecendo ou sen coñecer a orixe ilícita da información.

3.5. Protección e conservación do medio ambiente e a contorna para asegurar un futuro cheo de oportunidades

Para cumprir con este principio, quedan prohibidas as condutas que teñan por obxecto:

- Realizar actividades, tales como emisións, verteduras, ruídos, depósitos etc. que poidan causar danos no medio ambiente (atmosfera, solo ou subsolo, auga terrestre ou subterránea, mar ou alta mar).
- Realizar actividades que consistan en recoller, transportar, transformar, eliminar ou aproveitar residuos, ou non controlar ou vixiar adecuadamente tales actividades, de modo que causen ou poidan causar danos ao medio ambiente, ou morte ou lesións graves a persoas.
- Realizar actividades que consistan na explotación de instalacións onde se realicen actividades perigosas con posibles danos á calidade do aire, a auga, o solo, os animais, as plantas ou as persoas.
- Levar a cabo obras de urbanización, construción, edificación non autorizables en solos que teñan recoñecido legal ou administrativamente o seu valor paisaxístico, ecolóxico, artístico, histórico ou cultural.

3.6. Rexeitamento e denuncia da trata de seres humanos, tráfico de drogas, corrupción de menores ou delitos contra os cidadáns estranxeiros, o que eleva a nosa dignidade como persoas

Baixo este principio, quedan prohibidas as condutas tendentes a:

- Facilitar a entrada, tránsito, traslado, acollida ou recibimento de persoas nos aeroportos, portos e zonas fronteirizas cando sobre esas persoas (nacionais ou estranxeiras) se exercese violencia, intimidación ou engano con fins de explotación.
- Contribuír á produción, venda, difusión ou exhibición por calquera medio de pornografía infantil ou en cuxa elaboración sexan utilizadas persoas con discapacidade que necesiten especial protección, ou telo para estes fins, ou acceder a esta clase de material por calquera medio das tecnoloxías da información e comunicación.
- Traficar ou favorecer o consumo de drogas, estupefacientes ou substancias psicotrópicas como empresario, facultativo, traballador social, docente ou educador no exercicio do seu cargo, profesión ou oficio (son facultativos os médicos, psicólogos, as persoas en posesión de título sanitario, os veterinarios, os farmacéuticos e os seus dependentes).
- Axudar a unha persoa que non sexa nacional dun Estado membro da Unión Europea a entrar en territorio español ou a transitar a través del dun modo que vulnere a lexislación sobre entrada ou tránsito de estranxeiros.

3.7. Respecto aos dereitos dos traballadores, porque, en CLECE, o primeiro son as persoas

Quedan prohibidas as seguintes condutas:

- Impor aos traballadores condicións laborais ou de seguridade social que prexudiquen os dereitos que teñan recoñecidos por disposicións laborais legais, convenios colectivos ou contrato individual, empregando engano ou abuso en situación de necesidade.
- Empregar cidadáns estranxeiros ou menores de idade sen permiso de traballo.
- Impedir ou limitar o exercicio da liberdade sindical ou da folga mediante engano ou abuso de situación de necesidade, ou coaccionar outras persoas a iniciar ou continuar a folga.
- Non facilitar aos traballadores os medios necesarios para que desempeñen a súa actividade coas medidas de seguridade e hixiene adecuadas, de forma que poñan así en perigo grave a súa vida, saúde ou integridade física.
- Discriminar unha persoa pola súa ideoloxía, relixión ou crenzas, raza ou nación, sexo, orientación sexual, situación familiar, enfermidade ou minusvalía, por ostentar a representación legal ou sindical dos traballadores, polo parentesco con outros traballadores da empresa ou polo uso dalgunha das linguas oficiais do Estado español, e non restablecer a situación de igualdade ante requirimento ou sanción.